

**VENDIM**  
**Nr. 395, datë 28.5.2026**

**PËR MARRËDHËNIET E PUNËS, STRUKTURËN DHE KRITERET E  
PËRZGJEDHJES SË PUNONJËSVE TË NJËSISË PËRGJEGJËSE TË SINJALIZIMIT  
NË AUTORITETET PUBLIKE**

Në mbështetje të nenit 100 të Kushtetutës dhe të pikës 13, të nenit 14, të ligjit nr. 96/2025, “Për sinjalizimin dhe mbrojtjen e sinjalizuesve”, me propozimin e ministrit të Shtetit për Administratën Publike dhe Antikorrupsionin, Këshilli i Ministrave

**VENDOSI:**

1. Njësia përgjegjëse për sinjalizimin dhe mbrojtjen e sinjalizuesve në autoritetet publike me mbi 50 (pesëdhjetë) të punësuar dhe në personat juridikë publikë, që ushtrojnë veprimtari në fushat e shërbimeve financiare, të produkteve dhe të tregjeve financiare, të sigurimeve e të fondeve të pensionit, të parandalimit të pastrimit të parave e të financimit të terrorizmit, si dhe në çdo fushë tjetër të parashikuar nga aktet e Bashkimit Evropian, që kërkojnë ngritjen e kanaleve të brendshme të raportimit, përbëhet nga 2 (dy) punonjës.

2. Njësia përgjegjëse në autoritetet publike përbëhet nga drejtuesi i njësisë së auditimit të brendshëm dhe 1 (një) punonjës i saj. Në mungesë të drejtuesit, kjo njësi përbëhet nga 2 (dy) punonjës të njësisë së auditimit të brendshëm.

3. Në ato raste kur autoriteti publik nuk ka në strukturën e tij njësi auditimi të brendshëm, njësia përgjegjëse për sinjalizimin dhe mbrojtjen e sinjalizuesve përbëhet nga drejtuesi i strukturës së burimeve njerëzore dhe 1 (një) nëpunës/punonjës i saj. Në mungesë të drejtuesit, kjo njësi përbëhet nga 2 (dy) nëpunës/punonjës të strukturës së burimeve njerëzore.

4. Autoritetet publike, të cilat në strukturën e tyre kanë njësi të posaçme, ndër të tjera, për luftën ndaj korrupsionit dhe praktikave apo veprimeve të dyshuara të korrupsionit kryejnë edhe detyrën e njësisë përgjegjëse, në zbatim të ligjit nr. 96/2025 “Për sinjalizimin dhe mbrojtjen e sinjalizuesve”. Në këto raste, njësia përgjegjëse për sinjalizimin përbëhet nga 1 (një) ose 2 (dy) punonjës, në varësi të përbërjes së njësisë së posaçme.

5. Në ato autoritete publike, në të cilat nuk mund të zbatohen pikat 2, 3 dhe 4, të këtij vendimi, për shkak se nuk kanë njësi auditimi apo të burimeve njerëzore ose nuk plotësohet numri, sipas pikës 1, të këtij vendimi, njësia përgjegjëse plotësohet ose përbëhet nga 2 (dy) nëpunës/punonjës të përhershëm të autoritetit, të cilët, përveç kërkesave/kritereve të përgjithshme e të veçanta, të përcaktuara në legjislacionin që rregullon marrëdhënien e punës, duhet të plotësojë edhe këto kërkesa/kritere:

a) të ketë përvojë në profesion jo më pak se 2 (dy) vjet;

b) të ketë mbaruar arsimin e lartë në shkencat juridike, shkencat sociale, shkencat ekonomike ose disiplina të tjera, që lidhen me fushën e veprimtarisë së institucionit;

c) të mos jetë dënuar me vendim gjyqësor të formës së prerë për kryerjen e ndonjë vepre penale.

6. Autoritetet publike, që kanë degë territoriale në Republikën e Shqipërisë, krijojnë njësinë përgjegjëse vetëm në strukturën qendrore të tyre.

7. Caktimi si punonjës i njësisë përgjegjëse në autoritetin publik, krahas detyrave dhe funksioneve të pozicionit të punës, sipas aktit të emërimit, është pa afat dhe përfundon sipas njërit prej rasteve të parashikuara në pikën 12, të këtij vendimi.

8. Njësia përgjegjëse për zbatimin e ligjit nr. 96/2025, “Për sinjalizimin dhe mbrojtjen e sinjalizuesve”, si strukturë që ndjek në vazhdimësi sinjalizimin e shkeljeve të mundshme ligjore gjatë angazhimit në një kontekst pune/veprimeve të kundërligjshme, që cenojnë interesin publik, si dhe mbrojtjen e sinjalizuesve mban kontakte të vazhdueshme me Inspektoratin e Lartë të Deklarimit dhe Kontrollit të Pasurive dhe Konfliktit të Interesit (në vijim “ILDKPKI”). Njësia përgjegjëse në sektorin publik vepron në mënyrë të pavarur dhe jashtë çdo influence tjetër, të padrejtë, që mund të pengojë realizimin e detyrave të saj, në zbatim të ligjit nr. 96/2025, “Për sinjalizimin dhe mbrojtjen e sinjalizuesve”.

9. Punonjësit e njësive përgjegjëse ushtrojnë funksionet e tyre, në përputhje me parimet dhe rregullat e përcaktuara në ligjin nr. 96/2025, “Për sinjalizimin dhe mbrojtjen e sinjalizuesve”, veçanërisht në lidhje me konfidencialitetin, paanshmërinë dhe mbrojtjen e sinjalizuesit. Gjatë ushtrimit të detyrës, punonjësit e njësive përgjegjëse garantojnë ruajtjen e konfidencialitetit të informacionit dhe mbrojtjen e identitetit të sinjalizuesit, në përputhje me nenet 9 dhe 10, të ligjit nr. 96/2025, “Për sinjalizimin dhe mbrojtjen e sinjalizuesve”. Punonjësit e njësive përgjegjëse ushtrojnë funksionet e tyre në mënyrë të pavarur dhe shmangin çdo situatë të konfliktit të interesit, në përputhje me legjislacionin në fuqi.

10. Autoritetet publike marrin masat për të siguruar kushtet dhe mjetet e nevojshme të punës e të komunikimit, në mënyrë që punonjësit e njësive përgjegjëse të ushtrojnë efektivisht detyrat e tyre, në përputhje me parashikimet e pikës 9, të këtij vendimi.

11. Për çdo ndërprerje të marrëdhënies së punës, ndërmjet autoritetit publik dhe punonjësit të njësive përgjegjëse, informohet menjëherë ILDKPKI-ja. Titullari i autoritetit publik merr masat e nevojshme që të zëvendësojë menjëherë punonjësin e larguar të njësive përgjegjëse me punonjës të strukturës përkatëse ose, sipas rastit, të strukturave të tjera, duke zbatuar kriteret e përcaktuara në këtë vendim.

12. Punonjësi i njësive përgjegjëse largohet nga kjo detyrë me urdhër të titullarit të autoritetit publik, kur:

a) jep dorëheqjen me shkrim nga detyra e njësive përgjegjëse, e cila i dërgohet njëkohësisht edhe ILDKPKI-së;

b) dënohet me vendim gjyqësor të formës së prerë për kryerjen e një vepre penale;

c) kryen shkelje të rëndë të legjislacionit, që rregullon sinjalizimin dhe mbrojtjen e sinjalizuesve;

ç) përfundon marrëdhënien e punës me autoritetin publik.

13. Marrëdhëniet e punës së punonjësve të njësive përgjegjëse rregullohen sipas dispozitave të Kodit të Punës ose legjislacionit të posaçëm, që zbatohet për pozicionin në të cilin ata janë të emëruar.

14. Titullarët e autoriteteve publike caktojnë punonjësit në detyrën e njësive përgjegjëse, brenda 15 (pesëmbëdhjetë) ditëve nga hyrja në fuqi e këtij vendimi, dhe njoftojnë me shkrim inspektorin e përgjithshëm të ILDKPKI-së, për krijimin e njësive përgjegjëse, së bashku me kontaktet e saj.

15. Vendimi nr. 816, datë 16.11.2016, i Këshillit të Ministrave, “Për strukturën, kriteret e përzgjedhjes dhe marrëdhëniet e punës së punonjësve të njësive përgjegjëse në autoritetet publike, në zbatim të ligjit nr. 60/2016, “Për sinjalizimin dhe mbrojtjen e sinjalizuesve”, shfuqizohet.

Ky vendim hyn në fuqi pas botimit në Fletoren Zyrtare.

**KRYEMINISTËR**  
**Edi Rama**